

OMUKWETU



Oshifo shOngerki onkwaevangeli paLuther yomOwambokavango/Die Tydskrif van die Evangeliese Lutherse Ovambokavango Kerk

No. 20

OKOTOBA

1967

OSHITUTHI SHEYELITHO LYEITAALO SHOOMVU- LA 450

OSHIVILO OTASHI DANWA MOUNYUNI AUSHE

OvakwaLuther ve dule eemiliyoni 74. Mounyuni aushe keembinga neembinga, moiwana nomomalaka nomaluvala e lili noku lili, otava dana oshivilo eshi. Meeradio nomoifo nomomaudifo keembinga neembinga dounyuni otaku udika oukwashivilo. Vahapuhapu ova dana oshivilo eshi moshilando Wittenburg, omo Luther a tula omatomhelo komuvelo wongerki. Aveshe keembinga pamwe nafye yo, otava hambelele Kalunga omolwevangeli layela lomuJesus Kristus.



Luther ta pamhele omatomhelo

aye 95 komuvelo

wongerki muWittenburg.

Oshoka osho Kalunga a kala e hole ounyuni, Oye a yandja Omona waye Ewifa. Opo keshe tuu ou te mu itavele a ha kane, ndelene a mone omwenyo waalushe! Joh. 3:16.

KALUNGA OYE EGAMENO MATATI NEGONGA

(Eimbilo lyadr. M. Luther)

1. Kalunga oye egameno, Matati wo negonga. Oye note tu shigi wo. Moongodhi nomiiponga. Omutond' omuhindadhi, Oye omukondjithi, Omugey' omudhudhu ngo Ye omunandjahi wo Muuyuni mwaa nomukwawo.
2. Ts' ihatu sind' omutondadhi Koonkondo dhetu yene, Tse otu na Omupopili, OJesus Kristus mwene. Ote tu kondjele, Note tu gamene, Oye a sindana, Nokwa nyanyagula, Oonkondo ndho dhoheli.
3. Uuyuni nando u udhile ndo Oosatana pombanda, Ya hala ye tu mane po, Tse katu na uumbanda. Omupangeli ongu, Ta lel' uuyuni mbu, Kwa gee ta ndunduma, Ye iha vulu sha, sho Jesus okwe mu sindi.
4. Oohapu dhOmuwa tu dhi na, Dha kola kaadhi vulu. Omupopili ngu tse tu mu na, Kalunga komegulu. Nge taa tu yugu po Eliko, mwenyo wo, Tse twaa na ko na sha, Oshoka tse tu na Uuyamba waKalunga.



OMUKWETU

OKOTOBA 1967

AAFUTHI AAFUTHI AAFUTHI

Okwa kundanwa, oshinyangango ngalo shegongalo Edundja sha gwayelwa ishewe komufuthi. Okwa kondjitha okuteya oshiketha (Brandkas) shokupungula iimaliwa, ihe ina vula sha.

Iinyanga yomagongalo ayihe otayi ka mona mbala iketha ya kola yokupungula iimaliwa, onke aafuthi naa tseye kutya, otaa ki ihepeka ashike ngele taa ka konga iimaliwa miinyanga, ano otaku kuthwa onkatu ngashingeyi.

Ngoka to ende nedhiladhilo ndika, takamitha, Nampongo omu li pamwe naye.



Ovamati Ovawambo mefano, okwa li tava ningilwa omambo komwewangeliste F. Nghihalwa womOtavi. Ovamati ove li moilonga mofuka pokati kOtavi naKombat.


OMWENE OYE OMUFITA WANGE

Ps. 23:

Ovamati vetu, ovo tava longo mepangelo lomina, mokomboni inini Nuwe Campany, inava hala okumwena. Alushe tava popi Omwene oye Omufita wange, tave shi ningi noondjimbo. Omwene ne va yambeke.

Malakia Hauuanga.

P. H. Hanjango, Engela, ota ti: Ngenge tu li moudjuu mefimbo lounyasha, tu ifaneni ekwafo pombada tu tye: Omwene Jesus kwafe nge eenghono moilonga yange. Oye ote ku kwafa.



Aagundjuka mbaka yomuSwakopmund oya gongele iimaliwa, opo ya ka talepo egongalo lyaUsakos. Oya mono oshienditho shokolutenda she ya pula iimaliwa R 82.93 otwa li atuhe kumwe 53.

Ongula yOsondaha twa yi mongerki yaUsakos. Omwewangeliste Sedekia a kwatele komeho elongelokalunga. Omwewangeliste I.Kamho okwa uvitha. Konima yomambo otwa ka talelapo

iipangelo notwe ya imbile oondjimbo nokupopitha noohapu. Aayewangeliste ya popitha unene aantu noyamwe peha lyaagundjuka.

Ongulohi twa ningi ishewe ohungi. Aagundjuka mohungi oya imbi noya hokolola. Ausakos oye tu yakula wo palutu nopamwenyo. Iipopiwa ya popiwa mOshinama, Herero, Afrikaans, nOshiwambo. Otwa talalekwa koomwenyo esiku ndyoka.

Simon Kambonde.

OSHIPONGA SHOMUNONA A SILE MOMEYA

Sha halutha oomwenyo dhaantu.

POniipa pwa tukuka elaka pethimbo lyomutenya tali ti kutya: Omunona okwa gwile momuthima! Elaka lya taandele mbala nOniipa ayihe naantu, unene aanaskola naalongi yopOniipa, ya adhika ye li mootundi naashiinda oya matukile komuthima.

Oomwenyo dha haluka nopwa monika nehaluko kutya, okanona okamati Benjamin Ndakondjelwa Amakali, oye a sile momuthima gu li medhiya pooha dhegumbo lyahe Josef Amakali negumbo lyomusitagongalo gwOniipa Hofni Nakamhela.

Tate Amakali, oye omulongi omukulu mOniipa ta tseyika nawa koyendji. Ruben Amakali, omukuluntu gwanakusa, oye a ningine mbala momeya nokwa kutha mo okandenge, ihe ka li kaa nomwenyo. Ekwatho lya kongwa mbala moshipangelo mOndjokwe, ihe inashi kwatha sha.


Aanona yoosikola dhOniipa ya gongala oyendji ya kunduka omuthima sho okanona taka kuthwa mo notwa dhengwa koomwenyo.

Komatango kwa ningwa efumviko, lya ningwa komusitagongalo. Okwa popitha nokufatulula kutya, otu nomwenyo nando tatu si. Otatu mono omwenyo nokupitha meso, ngele twa kala muKristus sho a tumbula: "Oshike tamu kongo omunamwenyo mokati kaasi?"

Okwa imbwa omaimbilo gehekeleko nomapopitho wo. Osho tatu tala nkene tu na shili okulongekidha mbala okukala kwetu, oshoka ethimbo olye endeleda.

Olwindji pwa kundanwa iiponga yokusa momeya ha yi adha aakuluntu naanona. Onkee omolwomuthima niilambo yomeya yi li aluhe pooha dhomagumbo, otu nokugalikana aluhe: Tu gamena Omuwa kiiponga yombadhila, sho tse yene tatu tala tu ende aluhe medhimopo lyoondjo. Otatu halele aanegumbo lyaAmakali ehekeleko lyokegulu omoluhodhi lwawo.

Hilja Nakale, Engela, ota ti: Oufiku otaw xulupo nomutenya ou li popipi. Tu liduleni hano oilonga yomulaulu nde tu djaleni oiti youyelele. Tu endeni meenghedi diwa nde tu ninge ovana oवादुलि.



Luther okwa udifila ovanhu ve uye kexupifo lomuJesus Kristus omuvalelwa momushiyakano, olo fye yo twa pewa. Ota monika moshuudifilo kolulyo.

LUTHER OKWA MONO OMAPUKO MONGERKI YOPAROMA

Oye mwene ina hokwa omapuko noina hala aantu yaKalunga ya puki-thwe.

Dr. Martin Luther okwa longwa nawa nokwa ningi omuprofesori. Okwa longo elongo lyuukriste nokufatula Ombimbeli. Okwa kala wo nokuvitha nehwamo enene. Ewi lye lya li ewanawa lya kambula aayamba, oohepele, aagundjuka, aakuluntu, ookashuku naailongi. Okwe ya ulukile oohapu dhaKalunga tadhi tula omuntu mondjila notadhi hupitha. Omunongowino gumwe okwa li e mu pulakene okwa ti: Omwiikaleli nguka ota ka yambula aasitagongalo ayehe, ote eta elongo epe nota yelitha ongerki ayihe, oshoka oku li moohapu dha-

Kristus nokaku na ngoka te mu sindi.

Luther sho a yi kuItalia, okwa mono mo Aapristeli (aasita) ya gandja oshiholelwa oshiwiniyi kaantu. Okwa mono wo aasita yamwe inaa itaala shoka ya longo, oya sheke iipango nelongo lyongerki. Shika oshe mu ehameke shili. Luther sho a konakona nokupulapula aapristeli mbeyaka iinama yimwe, oye mu yamukula ya ti:

MuRoma omwa pungulwa elapi lyofei lyaVeronika, Veronika a li a pugula nalyo Jesus epupyu, sho a li mondjila yokuya kuGolgota. Ngoka ta tala elapi ndika nehalo lyehupitho, ota ka mona Omukulili nota hupithwa. Aaroma oye li ulukile Luther. Luther a yi kongerki nokwa tala nawa elapi nokwa mono kutya, olyo elapi lyowala kali na sha shilwe nando. Luther okwa ka tala ishewe ookatakombe, oombila dhaakriste yotango dhoomombogo mevi. Okwa tala iiketha yomidhimba, omasipa nomakende ge nombinzi yaahokololambinzi, mbyoka ya simanekwa kaakriste mbeyaka, ihe ayihe mbika inayi mu fudhitha komwenyo.

Gumwe e mu lombwele: Aawe, iilondelo yaPilatus otayi ku kwatha, nkoka Pilatus a londele sho ta ulukile aantu Kristus omuhepekwa. Oye etwa muRoma, nongele to kookaya kiilondelo mbika nokugalikana, ito limbililwa we edhimo lyoondjo. Luther e shi ningi, ihe ina mona ombili muye (Luther) mwa penduka ewi tali ti: Omuyuki oha kala nomwenyo keitaalo, ha kelapi nenge kiilondelo, okeitaalo alike. Luther a zi ko ihe a sohoni molwomaitaalo gopombambo ga pangele aantu mbeyaka.


OSHIPONGA SHOSHIHAUTO

Oshihauto shimwe shomoihauto yoilonga yeefikola, osha kandoma, omushingi Tuhafeni Andreas. Omumati Shatilue Gabriel Nanghaku wokomafo mOukwanyama, okwa valukwa unene eshi a wa mo. Okwa twalwa neulumo moshihakulilo mOshakati nde okwa mana kwinya oweenda waye. Ame nomushamane Jesaja Shipiki o-twa twala omudimba waye, keumbo lavo. Omwene ne va hekeleke ovo va filwa ngaha.


F. Nakanue.

OSHELA

Oshifo shimwe hashi nyanyangidifwa kongerki yaAnglikan kOdimbo, edina lasho "OSHELA", osha tongwa kutya, osha fya po paife. Hamushanga woshifo osho okwa shiivifa kutya, oshifo osha fya po, osheshi ihashi mono ovanyoleli novaleshi va wana nde otashi kanififa ashike oimaliwa oyo tai pumbiwa moku shi nyanyangidifa muKaaestad.




Luther ta mono Ombimbeli



Oshinyanga shomegumbo lyaLuther

LUTHER SHO A VULWA OMAPUKO, OKWA TUMBULA: “ONTUNDA OTANDI YI NINGI OMBULULU”



Martin Luther nomukulukadhi gwe Katarina

ELANDITHO LYOOMBAPILA

Julius II onakuhola omalugodhi, ngoka a li muupapa, Luther sho a li muRoma, okwa si nokwa landulwa kuLeo X. Nguka ka li a hokwa uu-kambe nomalugodhi, ihe uunongo nuunkulungu, unene momatungo. Okwa li a hala okutsakanitha etungo lyongerki ya Petrus omuyapuki ndjoka yu uvanekwa yi ninge ontempeli yuukriste yoopalelela. Ihe otayi tungwa ngiini? limaliwa oyindji yi thike mpo Leo ote yi adha peni?

Gumwe gwaakaridinale okwe mu tsu omayele a nyole oombapila dhedhimopo lyoondjo. Na ngoka ta kala e nombapila ya tya ngaaka ota manguluka komagelo gongerki nota kala e nedhimopo lyoondjo. Nakehe ngoka okwa li e na sha mpoka. Aapapa ya mono pamukalo nguka omaliko taga kungulukile kuRoma. Oshike Leo itaa longitha omukalo nguka?

Oyu uvathana nomumbisofi omukuluntu gwomu Mainz, edhina lye Albrecht, a ka landithe oombapila dhedhimopo lyoondjo muNdowishilanda. Omumbisofi omukuluntu a mono nziya **omuhalithi Johannes Tetzel**, omudominikani, ongoka kwoopalele oshilonga shika shili.

Tu taleni ano, nkene Tetzel ta longo oshilonga she. Okwa londo mokatamba komalenga ete ende noshilongo, ta thindikilwa kaalondi yuukambe yatatu. Ngele ta thiki popepi nomukunda, ota tumu elaka kepangelo kutya, esilohenda lya Kalunga na Tate omuyapuki oli li popepi, tali ya. Ayehe oya li ye nokwulongekidha ano. Aapangeli aapristeri aaikaleli aaikiintu, aanongeki naalongwa aalumentu naikiintu, eeno ayehe taa shi vulu, oye ya ya tyookiinteli dha tema momake taa hiki uuhumba uu-

ngendjo taa ka tsakaneka omulandithi gwoombapila dhekuthilo. Aantu nge ye mu kundu, ota londo okakambe, manga aalumentu yane ya kwata ondunda ombwambwambwambwa yi mu ningile omuzile. Onzapo yomupapa oya tetekela yi li moshigwilo shoongala shoopalelela. Ayehe taa yi kongerki, taa imbi omaimbilo, yo taa totomona omagalikano, nolwithi lwomatsinino ye li mulo omongerki nokahumba taka pumwa nuunkulungu.

Omushigakano omutiligane nomatati gomupapa taga langekwa koaltari. Tetzel ta londo koshiuvithilo, ta popi manga aantu taa pulakene, eta ti: “Omushigakano nguka omutiligane ogu noonkondo, ngashika omushigakano gwaKristus. Omuwa Kalunga ita pangele we, epangelo alihe okwe li p’omupapa. Onda hupitha aantu oyendji noombapila dhekuthilo ye vule mbe-yaka ya hupithwa komauvitho gomuyapostoli Paulus.

Oombapila ndhika itadhi kwatha aanamwenyo ayeke, ihe naasi wo. Yantu ne, kamu uvite oho noonyoko naamwanyoko taa kugu oonkugo – momulilo gwopokati? – Otaa lulumikwa shili nayi. Ya hupitheni nuugano uushona. Egulu nena olye egulukila ayehe. Otamu tindi okuya mo? Mpangulo lya hugunina otandi ka mangululwa, ihe ne, otamu geelwa, oshoka tamu dhini ehupitho enene li thike mpa. Nando mu kale mu nohe-ma yimwe ayike, omu noku yi gandjanoku yi landitha po, opo mu mone esilohenda.

Dhiladhileni tuu, iimaliwa tayi ningi yetungululo lyongerki yaayapostoli Petrus na Paulus naahokololambinzi oyendjiyendji. Omasipa gawo omayapuki ge li pontundulu taga lokwa notaga olo. Osho ngaa na shi tye ngaaka?”



Eyapulo lyoondjokana dha Luther na Katarina von Bora

Oku ulike koshiketha shosheela, moka hamu tulwa iimaliwa nokwi igidha lutatu, sho ta londoloka koshiuvithilo notu umbile mo oshimaliwa eta ti: “Kwatheni. Gandjeni. Kolekeni.”

Kape na omalimbililo, aapulakeni oya landula oshiholelwa shika. Tetzel okwa heke aantu. Eitedhululo itali pumbiwa, ngele taa futu, ayihe otayi kala ya yela.

Noondjo ndhoka tadhi ka ningwa komeho, omuntu ota pewa wo ombapila yekuthilo, ngele ota futu. Esiku limwe omumbala gwohamba George gwaSaksi okwa kotokele Tetzel. Okwa pe Tetzel iimaliwa 30, a futu ondjo te ke yi ninga komeho, nokwa pewa ombapila yedhimopo lyoondjo. Esiku limwe, Tetzel sho a li mokati ta ka halitha oombapila dhe, okwa matukilwa komumbala ngoka, nokwe mu ulike egonga pontulo ta ti: “Piimaliwa nomwenyo, kutha po shimwe.” Tetzel okwi igidha pombanda ngomunampwidhuli, ti ipopile nethingo lyongerki. Okwa li e nokugandja ayihe a li e yi na, nge a hala nenge ina hala. Omumbala okwe mu pe po ishewe omankawa goopala. Tetzel okwa nyenyeta pomukwaniilwa George nokwe mu popo a geelwa. Omukwaniilwa okwa li a geya, ihe omumbala sho a ulukile omukwaniilwa ombapila yekuthilo, ya nyolwa kuTetzel mwene, okwa ti owala: “Kwekwekwe-”, nomumbala a ethiwa.

Omuhalithi gwoombapila dhekuthilo okwi igugitha mwene, okwe shi ilongela wo, oshoka okwa pukitha aantu nayi. Okwa ngungumaneke aantu ya fa ya dhiminwa po oondjo, nando inadhi dhimwa po. Oya dhiladhila, nena otaa kala ngashika ya hala noyi inekele taa yi megulu, oshoka oya futila oondjo dhawo.

Aantu ya kala yaa noshimpwiyu naakanakanashanakalunga. Fredrik Muna ndunge okwa li uvite ko nawa nokwi indike ehalitho lyoombapila lyaa ye moshilongo she. Tetzal ka li ta vulu okuya muWittenburg, ihe okwa kala muJütebock neha ndyoka ka lya li kokule nongamba yaSaksi. Aanama-pya naanahambo naantu yomuWittenburg sho ye shi uvu, oya yi omathele ye ki ilandele oombapila ndhoka. Tetzal osho a li a hala, ihe Luther u uvite nayi mpoka, oshoka ngele ta kumagidha aantu yi itedhulule moondjo dhawo ya galukile kuKalunga, nena ota ye mu ulukile oombapila dhekuthilo noye mu lombwele taa ti; osha gwana she ya gwanenena, itaa dhiladhila nando okutopoka nuulunde wawo. Luther okwa li a tsuwa nayi, sho a uvu omalaka gedhinokalunga, nokwe dhi kondjitha nomauvitho ge noonkondo.

Aantu ya ningi oomwenyo ombwinyayi noye ke shi lombwela Tetzal kutya, Luther okwa dhini oombapila dhekuthilo. Omuhalithimbapilakuthilo a geye nonkondo. Oku umana, ta tukana ta sheke nokwa li ta tilitha aantu sho a londa koshiuvithilo. Okwa temitha omulilo omunene pomalandelo. Omo moka ta fikile aapukithi mboka taa yekelele okukondjitha oombapilakuthilo oondjapuki. Ou shi shono osha tilitha Luther? Aawe, okwa li u uvite kutya, kee na okumwena we. Okwa ti: "Kalunga ngele okwe shi hala, otandi ka ninga ombululu montunda!" Ina lombwela nando gumwe gwomookuume ke, shoka a dhiladhila okuninga, okwa li e nuupyakadhi owindji omasiku gamwe. Okwa nyolele mombapila onene iiludhikitha oyindji moka ta holola omadhiladhilo ge puueyelele kutya, ota dhini shili oombapilakuthilo ndhoka.

Sho a mana okunyola, okwa yi nombapila ye kongerki yaandjawa nokwe yi mbambalele komweelo. Ayehe mboka yi ile kongerki, oya mono ombapila onene yi li komweelo.

Esiku lya landula ko, 1November, aantu oyendjiyendji oye ya koshituthi shaayapuki kongerki noya pulathana, shoka sha nyolwa mombapila onene yi thike mpoka.



Luther ta lundulula Etest. Epe "muPatmos."

Luther okwa kondjitha ombapilakuthilo owina nokwa tokola, okwi ilongekidha a ludhike puueyelele nomuntu kehe a tsondumbo niiludhikitha ye 95. Ihe kakwa li ngoka e nomukumo okuludhikitha Luther moshinima shika. Iiludhikitha ya nyanyangidwa noya popiwa. Aantu mboka ya tseya oshilatina oye yi fatulula mOshindowishi eta ye yi nyanyangidhitha, Luther manga kee shi po sha. Pamukalo nguka oya taandele mbalambala mokati kaantu ayehe, noye yi leshelathana. Iiwike iyali sho ya piti po, oya li ya tseyika muNdowishilanda alihe, nomiiwike ine omwEuropa alihe. Ngomuntu oto ti, shila aayengeli yaKalunga ya li oonzapo dhokutaandelitha iiludhikitha mbika 95 yi adhe apehe.

Aantu, ya sindwa kiiludhikitha mbika, oya li oyendji ye vule mboka yi inekele oombapilakuthilo dhaTetzal. Shoka Luther a longo oshe ya popitha moomwenyo dhawo noya li yu uvite ko nawa. Omunashili kehe o-



Johannes Tetzal, omulandithi ngoka a li ta landitha oombapila dhedhimopo lyoondjo.

kwa panda Luther. Otatu uvu ko mbala, ngele tatu ka lesa nando iiludhikitha yimwe, ngaashi mbika:

Oshiludhikitha 32 - Mboka taa dhiladhila taa lagopalekwa koombapilakuthilo, otaa ka ya moheli pamwe naalongi yawo.

Oshiludhikitha 36 - Omukriste kehe e noluhodhi oluyuuki luulunde we, ota dhiminwa po oondjo, itaku pumbiwa ombapilakuthilo.

Oshiludhikitha 62 - Eliko lyashili lyongerki oyo evangeli lyaKalunga, lyeadhimo lyaKalunga nesilohenda lye.

Ihe Tetzal okwa li a geya, iipindi ye oya gongele eliko enene. Okwa tokola wo a nyolele iiludhikitha mbyoka ya leshwa muJanuari 1518 muFrankfurt pwOder. Okwa popile oombapilakuthilo nelongo lyadho nokwa ti: "Ngoka ta ti, omwenyo itagu zi momayelekamulilo (moshitheto shomwenyo), epeni sho tali kolokotele moshiketha, okwa puka." Okwa koleke epangelo lyomupapa miiludhikitha yi ili noyi ili. Okwa tema omulilo nokwa fike po iiludhikitha yaLuther nomambo gamwe ge eta ti: "Mupeni iiwike iyali nenge ine, nena omupukithi ota ka fikwa po."

Tetzal i ifundjaleke mwene, Luther ita si, ihe ota sindana. Opena ye ndjoka ya nyola iiludhikitha oya thiki kuRoma noya telaganitha oshishani shomupapa. Osha yaguminwe komukwaniilwa gwaSaksi nondjodhi ndjika oya li pokutsa, ngashika tatu ka mona komeho.

Luther ke nako na sha nokugeya nokutukana kwaTetzal. Okwa ti: "Onda fa ashike ndi uvite okasino taka yogegele ndje." Aakwaluther ngashingeyi oye vule oomiliyona 74.

OMAHEMPULULO GONGERKI ONKWAEVANGELI PALUTHER YOMOWAMBOKAVANGO

Ongerki onkwaevangeli paLuther yomOwambokavango oya kankamekwa mOmbimbeli, oyo Ohapu yaKalunga Ondjapuki ndjoka kayi na mpoka tayi puka. Elongo lya hempululwa kongerki pahapu dhaKalunga, olya holoka nawa mehEmpululo lyeita alo lya ayapostoli, mehempululo lyoku Nikea, nolya Atanasius, nolyoku Augustburg, nEpopilolyehempululo lyoku Augustburg, nOkatekisa okanekaka Dr. Martin Luther. Onkene tuu Ombimbeli ondjapuki oyo eutho lyeitaalo nolyelongo yi yule omanyolo nomahempululo agehe. (Ekotampango oshitendwa III).

MEMBO "OMAHEMPULULO GONGERKI" omo to mono omahempululo gongerki yetu. To mono wo omafatulo, elongo, omagalikano nooveta ngaashi twe yi pewa kuKalunga tu ende mudho. Owe li ilandela tuu? Ou li na? Ngele ku li na, mbestela mbala kOstora yOmambo kOniipa.

OONGOMBE DHA SI MUTSUMEB

Okwa kundandwa muTsumeb kutya: Oongombe dhi vule 200 odha si adhihe, sho dha nu omeya ge nuuzigo. Osha ningwa ondama yimwe yokupungula omeya gondoya ngoka ga longithwa momina mokuyoga iinima yi ili noyi ili ya nika uuzigo momina, oya teka ekuma nomeya ga popokele melundu gu uka mokamba yoongombe dhomina yaTsumeb. Oongombe dha nu omeya ngaka guuzigo nodha sa. Ngoye ngele to pashiyona mOshomeya, takamitha ino nwa omeya ngoka to adha taga kunguluka shaa mpoka.

VAHAPU VA FYA MEFUNDJA LOMEVA

Enghundana oda dja muBuenos Aires, da etwa koshifo "Suidwes-Afrikaner" sheti-13/10/67 tadi ti: Omeva efundja loshikungulu shinene, a kungulula oshitukulwa shinene shonhele ei, okwa dipaa ovanhu 21. Ovanhu ve dule 54,000 ova fiwa po vehe nomambo, eshi eenduda domaumbo avo da vakulwa ko komhepo.

NATANGO MUTSUMEB

Omwa hokololwa vali kutya, Omina yaTsumeb omafiku aa oya teka nde konyala oya dipaa ovanhu ve dule 100 ovo va hangika mo. Emania ola kala la tenda omufya nde owa konakonwa kutya, otatu oshiponga mefimo keshe. Onghe ovanhu va lombwelwa va dje mo momikala domina kombinga oyo ya tenda nde konima kwa udika embolokoto linene. Ava va xupa ngaha otava hambelele Kalunga. Umwe wavo e tu nyolela, ota indile ovaleshi vOmu kwetu, va indilile ovamati mehalakano, osheshi otava longo mokati koiponga yomaludi mahapu.

OMULAULE A FYA

Omulumenu omulaule, Frans Nawamenge, okwa fya ombadilila, eshi a lyatelwa kololi moshitata yaKahandja. Okwa twalwa neendelelo moshihakulilo, ndele okwa fya onguoshi yefiku tuu olo.

OUKULUNHUFIKOLA MOFIKOLA YOVAMATI MENGELA

- Omulongi wonhele ya tumbulwa pombanda ne li ufe komalombwelo aa:
1. a. Oku na okukala ena ondombwedi youhonngi.
b. " " " " yoshitanda onhinano -na- nhatu.
c. " " " a hong'a ofikola shi dulife peedula mbali.
 2. Ondjabi yaye otai ka ufwa kepangelofikola, Oukwanyama-OOS mewiliko lomuhona welongo moWindhoek.
 3. Omaehelo naa yukifwe kepangelofikola, Oukwanyama-Oos, Ohangwena Pk. Oshikango.
- Eindilo lomaehelo ofio eti-30 Novemba 1967. Konima yefiku eli ita ku ka nyamukulwa nande olimwe lao tae ke uya efiku eli la koya.

Hamushanga wEangelofikola,
Nepunda Samuel.



Omukriste henuka omaitavelo omapukifo

OSHIPONGA SHODILA

MuAthena omwa kundandwa kutya: Ovanhu 66 ova fya, eshi odila omo va li ya mbolokotela ponghulo yefuta lopuTurkye. Inapa dja nande ondada.

OIKUNUWA OYA YEULULILWA OVALAULE

Keembinga neembinga okwa dja omalaka nomoifo mwa fanekwa omafano ovalaule vomuSuidwes eshi tava lande oikunuwa meefitola dayo, oyo ve i keelwa nale. Okwa hokololwa kutya, inapa udika omakolokoto kutya, ngeno ovalaule tava kolwa unene sha pitilila. Omutoolinghundana eshi a pulu umwe opo a di kOushimba nghene ve shi udite, okwa nyamukulwa: "Itashi ti kutya, nge twa efelwa tu lande oikunuwa yovatilityane, ohatu nu sha pitilila, ahowe. Inatu hala tu shekife okukala kwetu notu ninge eengholwe, ahowe. Ou ta pwiduka moikunwa onawa oveta tai mu handukile shili."

UMWE A AFYA

Oshifo "Die Suidwester" shaWindhoek sheti-16 Okotoba 1967 mepandja lotete, osha hokolola kutya, umwe wa ovo 37 tava pangulwa muPretoria Ephraim Kamati Kapolo, okwa fila moshipangelo muPretoria.

OMBODO

Ombodo, oyo okapuka komaludi lwomambodwe. Okanamwenyo keli ngaho, oko okafifiti, okanyoni okahanauni, okatwi kondumbo noinima yomunhu nokanyateki.

Ou ka shii ngo nawa noukwatya wa ko ou? Haiti, pamwe wa dimbwa kanini oilonga yako. Inda u tale meengulu odo inadi nyika okweedilwa nawa. Nande da li da kolongwa nawa nawa, oto hange mo outombotombo vahapu noidinda penya naa pee. Etungo la li liwa la nyonaunwa nai. Ka li na vali omutalelo, lanyata la ipikwa nai.

Epuka eli olo satana, ou e li po e tonde eshito laTate Kalunga. Tate a shita omunhu waye muwa ha duli ka ha tila okuninga nai kOmushiti waye. Ta tila okuhanyenwa nokuhandukilwa nokudengwa nofingwa.

Paife satana aya momutima womunhu. A tula mo okuhola edimo needunge dohole yeliko. A kandula po ohoni momesho a vahapu. Nde tava fii po omalupale nomapata momambo avo va ye moixwa, moutunhu nomomahenene.

Omo ve li va kanifa omaliudo mawa nohole netilo lokutila Omushiti wavo. Tava li, tava nu tava imbi mokule notava dana nokudinifa oukriste wavo. Kave nomatwi vati, satana a fitika filufilu omatwi avo. Aveshe veli ngaho, ovo ovana vongerki. Paulus ta ti: Ehandu laKalunga tali holoka tali di keulu lihange odino aishe noukolokoshi movanhu ovo hava kaleke oshili moukolokoshi. Rom. 1: 18.

Oixuna shili okuwila meke laKalunga omunamwenyo.

A.Mungungu.

Endola.

MPANDU ZETAMBEKERO

Vakurona novamati womokomboni zomoKombat, nzambo zeni ezi mwa tuma morwa sirugana setumo lyomovaduni moKavango. Muyevangeliste Sakaria A. Nashongo ga zi sikisa ngamoomu mwa zi tuma R2. 151/2c.

Yosili etungiko lyeni muna ligava li kare etungiko lyovaduni kuzuva nonkango daKarunga. Karunga amutungikire ugavi owo, u kare tau hepura vapagani hena. Karunga ogu muna pe, mukurona gwanayinye, ta ka mu tungikira yiweko yeni pauhi nkennda wendi. Tani mu kundu medina lyomutayingereka nomedina lyosirugana setumo mu tambure ekundo eli. Yirug. 20:35.

Mupini 26.9.1967. Mupahukili:

E. Neromba.

EHANGANO LYOONGERKIOONKWA- EVANGELI PALUTHER MUSUIDER — AFRIKA (FELKSA)

ONKUNDANA YA ZI KOMUPRESIDENTE GWAFELKSA

oya tuminwa oongerki adhihe yi leshwe moshituthi sheyelitho lyeitaalo shomimvo 450. L.Shemuvalula e yi lundululila mOshindonga notayi landula mpaka:

Mesiku eti-31 Oktoba 1517 omwiikaleli Martin Luther okwa mbambangela noomboha omatompelo 95 komweelo gwongerki yomu Wittenburg. Esiku lyeitelitho lyeitaalo otatu li yalula okuzakusiku ndyoka notatu tala ano konima yoomvula 450 dhetameko lyeitelitho lyeitaalo.

Onawa okudhimbulukwa kutya, Martin Luther okwa tameke onkatu ndjika manga a li natango omupristeli (omusita) gwongerki yopaRoma. Edhiladhilo lye kalya li ndyoka, a tokoke ko kOongerki yaRoma nokutota ongerki ye mwene, aawe. Okwa li a hala monkatu ndjika okuyeleka oshinima shimwe melongo nomomikalo dhongerki ndjika. Komeho Luther okwa kondwa mo mongerki yopaRoma pamwe naamboka ya gama kuye.

Halyo lya li edhiladhilo lyaLuther okupangula ongerki, nEhempululo lyeitaalo lyokuAugusburg otali popi naanaa ongerki yimwe (una sancta ecclesia). Otse tu nokukambadhala tu mweneke uugumwe wolutu lwaKristus, tu tameke okuninga ombili notu konge ekwatathano nulyo yoongerki dhilwe dhopakriste. Okutameka shika otu nokukonga euveko nehangano meni lyuukwazimo waakwaLuther mēvi lyetu.

Eyelitho ndika lyeitaalo olya li unene tali pumbiwa omumvo 1517, ihe eyelitho lyeitaalo otali pumbiwa natango moonkatu dhiilonga yehistori lyongerki. Eyelitho lyeitaalo kali shi ashike oshiningwanima mokweenda kwehistori lyongerki, tu shi talele ando lwanima sha pwa thilu. Ecclesia reformata semper reformanda olya yeleka li kale ekota lyomadhiladhilo noonkatu dhokulonga kwetu ongaakwaLuther aawanawa. Etompelo lyaLuther lyotango lyomomatompelo ge 95 otali holola, okwiipa uusama wokukalamwenyo kwopakriste, nandi gwedhe ko kutya, okwa kehe nosho okwongerki.

Nando ongeyi otatu tala konima nomapandulo omanene kukehe shoka

Kalunga e shi tu pe omagano muMartin Luther. Otu na wo okupandula, oshoka oshindji shoka Luther a holola, osha ningi ehanganothigululo lyongerki adhihe dhopakriste, noyaRoma wo. Luther okwa lundulula Ombimbeli mOshindowishi nokwa holola oshili nawa melaka lyaavalelwamo. Tse atuhe nosho ongerki yaRomaKatoli, otatu longele kumwe ngashingeyi, tu lundulule Ombimbeli noku yi opaleka nelalakano kutya, elaka lyEvangeli li uvike ko nuupu kaantu ayehe. Eliko enene lyomaimbilo ngoka twa pewakuLuther mwene naangoka twa taamba kuyalwe konima ye, ohaga imbwa ga faathana moongerki dhi ili nodhi ili ngaashingeyi.

Etompelo enene eti-62 lyomumvo 1517 otali popi eliko lyongerki kutya: "Eliko lyoshililyongerki olyo Evangeli eyapuki lyesimano nesilohenda lyaKalunga alike." Luther okwe tu pa ehuku lyesilohenda lyaKalunga, Kalunga ngoka ta pe omunandjo edhimopo lyoondjo mesilohenda amuke. Kalunga ina pumbwa omayeleanitho gasha molupe lwiilonga iiwanawa. Ngoka ta tula einkelelo lye muKalunga note mu dhama meitaalo, ota pewa kuye edhimopo lyoondjo. Uuyapuki uunene wEvangeli lyaJesus Kristus owe tu hololelwa ishewe ngaaka kenda lyokuWittenburg.

Shika itashi ti ando kutya, omukriste ke noondjo, aawe. Omukriste omunandjo, ihe omunandjo ngoka a dhi-minwa po oondjo dhe. Pahapu dhaLuther: semper peccater, semper penites, semper justus=aluhe omunandjo, aluhe omwihempululi, aluhe okwa yukipalithwa.

Omaliko ngoka Luther e tu hololululile ogo omanene noga indjipala. Tse tu taleni ashike lwanima komumvo 1517 nomapandulo gomutule oge ndji. Omahambeleso getu otaga kala shili gomuuule, ngele tatu ilongo nokukonakona omatompelo gongerki yetu notu ga longithe. Kalunga ne tu zaleke oonkondo pauthiga mbuka uunene. —"Ongame itandi si, otandi kala nomwenyo notandi hokolola iilonga yOmuwa." Ps. 118:17.

P.G.Pakendorf,
PRESIDENT.

OVAKWALUTHER OVA HANGANA

OvakwaLuther mounyuni ova hangana. Ehangano lavo ohatu li ifana Ongongahangano yovakwaLuther mounyuni. Ongerki yetu yOwambokavango oyo oshilyo shomehangano eli. Ehangano oli noiyoongerki dihapu. Odi li muEuropa, Amerika, Asia, Afrika na Australia. Odomalaka, omaludi nomikalo di lili nodi lili. Etestamendi Lipe naLikulu, Ehepaululo lokuAugsburg nOkatekisa kanini kaLuther otai longifwa meengerki eenghwaLuther.

Oilyoongerki dhOngongahangano ei ohadi ongala moshongalele shinene (assembly) noshongalelepangelo (executive Committee) omo oilonga yoilyoongerki tai tokolwa. Omupresidende wongongahangano yovakwaLuther paife oye dr. Fredrik A. Schiotz nahamushanga akula oye dr. André Appel. Ope noohamushanga voilonga i lili noi lili. Eembelewa dongongahangano odi li muGeneva, Switzerland, Omubishofi L. Auala oye oshilyo shimwe shongundupangeli yongongahangano nde okwa kala nokuli moyoongalele imwe. Oilyo yongerki yetu imwe oudwaali oya ile koshoongalele shova-

kwaLuther aveshe muEthiopia. Ohatu mono kutya, ovakwaLuther ovahapu mounyuni nde otu li mengungo linene lovaitaveli vakwetu mounyuni aushe. Ongerki yetu oya talelwapo nokuli kovaenda vahapu efimbo nefimbo. Vamwe ova dile naanaa muGeneva nde va tala oshilonga shaKalunga tashi longwa mokati ketu. KOngongahangano okwa dja yo omakwafoimaliwa, oyo ya tungifa omatungo amwe ongerki tu a kwete mokati ketu. Kalunga na pandulwe.



Iilyo yongerki yetu mbyoka ya yile kuEthiopia

AANA YAKALUNGA

Gal. 3: 26-27

Omuwa Jesus sho e ya muuyuni mbuka wu udha omilema dhuulunde okwe ya molupe lwomuntu.

Ethimbo ndika Kristus sho a holoka, opo mpaka pwa tameke wo ethimbo nuuyuni weitaalo okwiitaala Kristus.

Onke shaa ngoka itaala Jesus noku mu inekela shili, nena omuntu a tya ngaaka, okwa yi mekwatathano naJesus. Oye ngoka a yi mo wo muuvalwa mbuka womuKalunga, a ningi omuna gwaKalunga keitaalo alike.

Tse aakriste otu na onzapo ya yela nawa, kutya, uuna twa taambwa meshasho eyapuki, otwa taambwa mo omolu oohapu dhaKalunga ndhoka dha taambathana neitaalo alike, hana sha shilwe. Tala, nena Kristus nomu-

ntu oye li mehanganano limwe notaa kala ngomuntu gumwe. Nuukwatya wo wa ningi umwelela kau shiwe okuyoololwa.

Osho ano ngeyi ekwatathano ndika olyaHe nOmwana nOmbepo Ondjapuki. Uuntu kau we tike we, oKristus a ningi omuzalo tagu sikile uuntu wetu. Uuyuki womuntu mwene tau ningi ongonguwo ya kulupa yaa shi okuzalwa we.

Tu ndhindhlike nawa kutya, uuyuki waKalunga oJesus, mungoka Kalunga te tu taambe muuvalwa we. Onke tu angale uuyuki mbuka wetu wa fa ohema yoshinyanyu. Tse tu taambe waanguka e tu ningilwa uunongo nuuyuki nuuyapuki nekulilo oKristus.

Tomas Shindongo

OMUPRESIDENDE OMUKWALUTHER A HOGOLOLWA

SAO PAULO, Brazil.- Omulu mentu omukwaLuther okwa hogololwa lwotango, omutse gwomaitaalo omakwaProtestant muLatin Amerika.

Oye omusitagongalo Karl Gottschald, ngoka a hogololwa moshigongi shoongerki oonkwaLuther sha gongala muBrazil.

ONGERKI ONKWA EVANGELI MUHONGARIA

Oyi niilyo 430,000 ngashingeyi. Omumbisofi gwayo Kaldy sho a pulwa okwa yamukula: Osho shili kutya, iilyo yongerki yetu oya adha nena 430,000. Ihe ndi nokugwedha ko kutya, omwaalu nguno ogwa adhika nekondjo, sho kwa kongwa kehe omukalimo gwaHongaria ngoka a shashwa mongerki yopaLuther.

ESHIVIFILO

Paife efimbo ola fika, ovo mwa hala mu leshe oshifo shOmukwetu omudo tau uya 1968, mu lishangife nde mu mbeshitele divadiva oshifo sheni. Tu endeeleni diva fimbo inatu uya pexulilo lomudo. Oikwatakwata ohai nyika edilo, ino tokelwa vali ngoudwaali.

Ou iho tambula shito oshifo, djamomeemhofi nde mbeshitela diva. Ou iha leshe oshifo okwa fifikina.

Oshifo shOmukwetu otashi landwa kodula 60c mOwambo, kOushimba nOkavango 80c molwostombe. Oshifo shEhangano otashi landwa momudo 15c mOwambo, kOushimba nOkavango 20c molwostombe. Tu endeleele divadiva!

„OMUKWETU” oha zi mOniipa.- Omukuluntu gwoshifo/ Hoofredakteur: Omumbisofi Leonard Auala, amushanga gwoshifo/ Redakteur: Leonard M. Shemuvalula, Oniipa, Pk. Ondangwa.- Ondando komumvo mOwambo 60c, mUushimba nOkavango 80c. Oofuto nomambestelo naga tumwe kOmukwetu, Oniipa, Pk. Ondangwa.- Moka hashi nyanyangidhwa: FINSE SENDINGDRUKERY, OVAMBOLAND, S.W.A.